

### **En B(ernart) de Bondelhhs.**

Tot aissi'm pren com fai als assesis,  
qe fan tot so qe lurs seinhers lur di,  
qe no'n pensan failhir ser ni mati,  
tant lo crezon e tant ll'es chascus fis;  
5 e le seinhers, qar conois certamen  
qe chascus fai de grat son mandamen,  
fa'ls comensar tal re, segon q'aug dir,  
don prendon mort, ans q'o pueSCAN complir.

Tot eissamen hai ieu estat aclis  
10 e fins e francs vas amor, so'us afi,  
en tot qan puec, qez anc non y failhi,  
antz totas ves outra poder m'enmis.  
e qan conoc qe ses tot trichamen  
ll'era obligatz per far tot son talen,  
15 fes mi tal re comensar don sospir  
e don breumens crei qe m'er a morir.

Quar veramen la gensor, q'om anc vis,  
des qe Adams fon criatz tro aici,  
et aquela qe mais ha de prez fi  
20 e de bons aibs, mi mandet qe servis  
e qe ames ab frem cor fermamen;  
et ieu com fins am l'ades finamen,  
qar anc ailhors, pos la'm mandet servir,  
no'm virei iorn ni'm virarai ni'm vir.

25 Car ses conten faz e farai e fis  
per vos, amors, so q'anc non fis per mi  
ni o farai, aissi Jhesus me gi,  
per tot qant anc poc aver Costantis;  
doncs pos per vos fas tan gran ardimen,  
30 ben er granz tortz si tant aul chاوزimen  
aves de mi qe ia'm laisses aucir,  
pos per vos muer, e per vos puesc garir. —

Garir? — breumen, si'm don dieus so q'ie'll qis  
e'l qier encars, e doncs auiatz cossi:  
35 qe'll gran maltrach qe nuech e iorm m'auci,  
e'l greu turmen, qe volgestz q'ieu suffris,  
mostres ades, ses tot alongamen,  
a la gensor qe'm fai viure muren,  
qar, pos sabra com mueir, crei qe sufrir  
40 volra q'ieu l'am, qe ren als non deçir.

Chansos, si't plai, a Point te'n vai coren  
al pro marques del Carret, q'a prez gen  
fai tot qant tainh, per q'ieu vueilh enantir  
sai entre'ls pros son prez e far auçir.

45 E fora lai ab lui, so'l poiras dir,  
mas pres mi ten la res q'ieu plus dezir.